

**A C T A 10/2021**  
**SESIÓN ORDINARIA PLENO MUNICIPAL**  
**- 24 DE NOVIEMBRE DE 2021 -**

Na Casa do Concello, a vinte e catro de novembro de dous mil vinte e un, reúnen-se en primeira convocatoria as/os señoras/es concelleiras/os que se relacionan a continuación, baixo a presidencia do sr. alcalde, D. Rafael C. Sisto Edreira, co obxecto de celebrar a sesión ordinaria correspondente ao día da data, para a que foron debidamente convocadas/os.

**ASISTENTES:**

**Alcalde:**

D. Rafael Carlos Sisto Edreira

**Concelleiras/os:**

D.<sup>a</sup> Iria Otero Romero  
D. Xosé Ignacio Igrexas Vilar  
D.<sup>a</sup> María López Álvarez  
D. José Manuel Guerra Calvelo  
D. Antonio Reyes Sánchez Crespo  
D.<sup>a</sup> María Vázquez Rey  
D.<sup>a</sup> María Dolores Nariño Facal  
D.<sup>a</sup> María Teresa Castro Framil  
D.<sup>a</sup> Lucía Calvo de la Uz  
D.<sup>a</sup> Margarita Rosende Domínguez  
D.<sup>a</sup> Uxía Lemus de la Iglesia  
D. Roberto Moñino Gil  
D.<sup>a</sup> María Josefa Argibay da Silva  
D. José Manuel Elías Noya  
D.<sup>a</sup> Carmen Diéguez González  
D. Manuel Barreiro Rozados

**Secretaría xeral:**

D.<sup>a</sup> Virginia Fraga Díaz

**Interventora:**

D.<sup>a</sup> Mónica I. Lado Varela

**ORDE DO DÍA:**

- 1.- APROBACIÓN DA ACTA DA SESIÓN ORDINARIA DE 29/09/2021**
- 2.- DACIÓN DE CONTA DAS RESOLUCIÓNS DA ALCALDÍA (DA 1116/21 á 1281/21)**
- 3.- RATIFICACIÓN DA RESOLUCIÓN DA ALCALDÍA DO 20/10/2021 (RES 1110.21) DE APROBACIÓN DO “PREGO PRESCRICIÓNS TÉCNICAS QUE REXERÁN A SUBMINISTRACIÓN DUN SILO DE ACEIRO PARA ALMACENAMENTO DE LODOS NA EDAR DE PONTEVEA”(POS+2021)**
- 4.- RATIFICACIÓN DA RESOLUCIÓN DA ALCALDÍA DO 08/11/2021 (RES 1218.21) DE NOMEAMENTO DE REPRESENTANTES DA CORPORACIÓN NOS CONSELLOS ESCOLARES**
- 5.- DITAME DA PROPOSTA DA ALCALDÍA DE DECLARACIÓN DE CRÉDITO NON DISPOÑIBLE**
- 6.- DITAME DA MOCIÓN DO GRUPO MUNICIPAL DO PSdeG-PSOE CON MOTIVO DO DÍA 25 DE NOVEMBRO, DÍA INTERNACIONAL DA ELIMINACIÓN DA VIOLENCIA CONTRA A MULLER**
- 7.- PROPOSICIÓN DO GRUPO MUNICIPAL DO BNG SOBRE O INCREMENTO DOS RECURSOS ECONÓMICOS DESTINADOS ESPECÍFICAMENTE A LOITAR CONTRA A VIOLENCIA DE XÉNERO**
- 8.- MOCIÓNS**
- 9.- ROGOS E PREGUNTAS**

Co quórum establecido polas disposicións legais vixentes para a válida constitución do Pleno, o sr. alcalde, sendo as vinte horas, declara público e aberto o acto.

### **1.- APROBACIÓN DA ACTA DA SESIÓN ORDINARIA DE 29/09/2021.**

O sr. alcalde preguntalle ás/aos sras./es. concelleiras/os se desexan formular algunha observación á acta da sesión ordinaria celebrada o 29 de setembro de 2021.

Non habendo observacións ao respecto, queda aprobada a acta citada.

### **2.- DACIÓN DE CONTA DAS RESOLUCIÓNS DA ALCALDÍA (DA 1116/21 á 1281/21).**

Dáse conta das Resolucións da Alcaldía ditadas dende o día 22 de outubro ata o 18 de novembro de 2021, que comprenden os números 1116 ao 1281, indicando o sr. alcalde que estiveron a disposición de todos os membros da Corporación.

O Pleno da Corporación dáse por enterado.

### **3.- RATIFICACIÓN DA RESOLUCIÓN DA ALCALDÍA DO 20/10/2021 (RES 1110.21) DE APROBACIÓN DO “PREGO PRESCRICIÓNS TÉCNICAS QUE REXERÁN A SUBMINISTRACIÓN DUN SILO DE ACEIRO PARA ALMACENAMENTO DE LODOS NA EDAR DE PONTEVEA”(POS+2021).**

O sr. alcalde da conta da Resolución da Alcaldía de 20 de outubro de 2021 (res. 1110/2021), que se incorpora como anexo á presente acta.

O sr. alcalde explica que, en atención ao solicitado pola Deputación, foi precisa unha modificación no prego de prescricións técnicas nalgúns aspectos como a localización máis exacta da colocación do silo e outros puntos sen maior transcendencia, sen que se modifique ningún dos aspectos económicos.

Preguntado polo sr. alcalde, os grupos municipais non fan uso das súas respectivas quendas de intervención, non abríndose debate ao respecto.

**Sometido o asunto a votación, o Pleno da Corporación, por unanimidade dos seus membros (4 Son de Teo, 7 PP, 4 PSdeG-PSOE e 2 BNG), acorda ratificar a Resolución da Alcaldía de 20 de outubro de 2021 (res. 1110/2021), anexada a presente acta.**

#### **4.- RATIFICACIÓN DA RESOLUCIÓN DA ALCALDÍA DO 08/11/2021 (RES 1218.21) DE NOMEAMENTO DE REPRESENTANTES DA CORPORACIÓN NOS CONSELLOS ESCOLARES.**

Dáse conta da Resolución da Alcaldía de 8 de novembro de 2021 (res. 1218/2021), que se recolle a continuación.

##### **“RESOLUCIÓN DA ALCALDÍA**

**ASUNTO:** NOMEAMENTO DE REPRESENTANTES DA CORPORACIÓN NOS CONSELLOS ESCOLARES

**EXPEDIENTE:** 2021/G003/001288

No Pleno ordinario do 31 de xullo de 2019 realizouse o nomeamento de representantes da Corporación en órganos colexiados, de acordo co disposto no artigo 38.c) do R.D. 2568/1986, do 28 de novembro, polo que se aproba o Regulamento de Organización, Funcionamento e Réxime Xurídico das Entidades Locais.

No Pleno ordinario do 3 de marzo do 2021 modificouse á persoa representante da Corporación no Consello escolar do C.R.A. de Teo.

Á vista das comunicacións recibidas dos centros educativos de Teo, que deben renovar o respectivos consellos escolares, e de que as datas das renovacións son anteriores á convocatoria do vindeiro Pleno ordinario, é preciso realizar ditos nomeamentos, que deberán ser ratificados posteriormente no vindeiro Pleno ordinario.

En virtude do exposto e no uso das facultades que me confire o artigo 21.1 da Lei 7/1985, do 2 de abril, reguladora das bases do réxime local e demais normativa aplicable,

##### **RESOLVO:**

**Primeiro.**- Nomear ós/ás concelleiros/as que se detallan a continuación, como representantes desta Corporación nos seguintes Consellos Escolares:

- Consello Escolar do I.E.S. de Cacheiras: D. Antonio R. Sánchez Crespo
- Consello Escolar do C.E.I.P. de Calo: Dna. María López Álvarez
- Consello Escolar do C.E.I.P. A Ramallosa: Dna. María Vázquez Rey
- Consello Escolar do C.E.I.P. dos Tilos: Dna. María Josefa Argibay da Silva
- Consello Escolar do C.R.A. (Colexio Rural Agrupado): D. Manuel Barreiro Rozados

**Segundo.**- Dar traslado do presente acordo aos/ás concelleiros/as e notificalo aos órganos citados para o seu coñecemento e efectos oportunos.

**Terceiro.**- Ratificar a presente Resolución no vindeiro Pleno ordinario que se celebre”.

Preguntado polo sr. alcalde, os grupos municipais non fan uso das súas respectivas quendas de intervención, non abríndose debate ao respecto.

**Sometido o asunto a votación, o Pleno da Corporación, por unanimidade dos seus membros (4 Son de Teo, 7 PP, 4 PSdeG-PSOE e 2 BNG), acorda ratificar a Resolución da Alcaldía de 8 de novembro de 2021 (res. 1218/2021), anteriormente transcrita.**

## **5.- DITAME DA PROPOSTA DA ALCALDÍA DE DECLARACIÓN DE CRÉDITO NON DISPOÑIBLE.**

O sr. alcalde da conta da proposta de 5 de novembro de 2021, que se recolle a continuación, ditaminada favorablemente pola Comisión Informativa de facenda e asuntos económicos, Comisión especial de contas, de 18 de novembro de 2021.

### **“PROPOSTA DA ALCALDÍA**

Visto o informe de intervención de data 04/11/2021 relativo á situación de determinados créditos do Orzamento Municipal para 2021 que están duplicados, xa que no período entre o 01/01/2021 e a data de entrada en vigor do Orzamento se aprobaran varios expedientes de incorporación de remanentes de crédito do exercicio 2020 a 2021, figurando de novo eses créditos no Orzamento novo aprobado (de xeito que están duplicados), e que son os que de seguido se indican:

| <b>PARTIDA</b> | <b>PROXECTO</b>                     | <b>IMPORTE</b> |
|----------------|-------------------------------------|----------------|
| 160/619.00     | BOMBEO DE SANEAMENTO EN CAXADE      | 270.919,00€    |
| 453/619.00     | AFIRMADO E ACONDIC EO DOS FERREIROS | 101.851,21€    |
| 450/619.00     | REURBANIZACION DO NUCLEO DE SESTELO | 221.609,99€    |



|            |  |             |
|------------|--|-------------|
| 134/619.00 | SENDA PEONIL DE SAN DOMINGOS<br>A CS FOLGUEIRAS  | 187.169,91€ |
| 330/619.00 | MANTEMENTO E REFORMA DO<br>CENTRO SOCIAL DE REIS | 87.926,36€  |

Considerando que, segundo dito informe de intervención, os créditos anteriores deberían de ser declarados indisponibles coa finalidade de non exceder o gasto do capítulo 6 neste exercicio 2021, debendo realizarse tal declaración nos termos que indica o artigo 33 do RD 500/1990, de 20 de abril.

PROPOÑO ao Pleno da Corporacion, previo dictame da Comision de Facenda e Asuntos Económicos, a adopción do seguinte ACORDO:

**Primeiro.-** Declarar como non dispoñibles os seguintes créditos do estado de gastos do Orzamento Municipal para 2021 por estar duplicados:

| <b>PARTIDA</b> | <b>PROXECTO</b>                                  | <b>IMPORTE</b> |
|----------------|--|----------------|
| 160/619.00     | BOMBEO DE SANEAMENTO EN<br>CAXADE                | 270.919,00€    |
| 453/619.00     | AFIRMADO E ACONDIC EO DOS<br>FERREIROS           | 101.851,21€    |
| 450/619.00     | REURBANIZACION DO NUCLEO DE<br>SESTELO           | 221.609,99€    |
| 134/619.00     | SENDA PEONIL DE SAN DOMINGOS<br>A CS FOLGUEIRAS  | 187.169,91€    |
| 330/619.00     | MANTEMENTO E REFORMA DO<br>CENTRO SOCIAL DE REIS | 87.926,36€     |

**Segundo.-** Dar conta do presente acordo aos servizos económicos municipais coa finalidade de que se realicen as anotacions contables pertinentes”.

O sr. alcalde aclara que a razón de facer indispoñible este crédito é que está duplicado e non sería lóxico ter un crédito orzamentario do que poder botar man e gastar o dobre do necesario. A orixe está en que o orzamento vixente entrou en vigor a mediados de febreiro, despois da súa publicación, e nese período houbo que prorrogar os

orzamentos, prorrogándose tamén as obras que estaban xa iniciadas, o importe desas obras, e como ían no orzamento do ano seguinte por iso figuraban agora nos programas de contabilidade por duplicado e no propio orzamento. Por esa razón hai que acordar a indispoñibilidade deses créditos para non facer un dobre gasto, que realmente non estaba aprobado orzamentariamente.

Aberta a primeira quenda de intervencións, o portavoz do BNG, sr. Barreiro, e a portavoz do PSdeG-PSOE, sra. Lemus, non fan uso das súas respectivas quendas de intervención.

Intervén o portavoz do PP, sr. Guerra, quen lle cede a palabra á concelleira do seu grupo D.<sup>a</sup> Lucía Calvo de la Uz.

A sra. Calvo explica que van a votar que si porque o contrario sería unha imprudencia, e supón, dado o informe da Intervención, que detectaron en Intervención esa duplicidade deses créditos. Manifesta que non entende moi ben como ao elaborar o orzamento non se deu conta ninguén de que esas partidas estaban duplicadas, ou que ó mellor déronse conta, porque se trata de case 900.000 euros, que é moito diñeiro. Dubida a sra. Calvo de que non sexa outra práctica de inflamento, coma o dos terreos e demais, porque un error de 900.000 euros é moito. Dirixíndose ao sr. alcalde dille que el sabe que eses créditos xa estaban elevados ao Pleno e aprobados, polo que non tiña que telos incorporado no orzamento.

O sr. alcalde explica que cando se aproban uns orzamentos apróbanse enteiros, de todo o que se vai a executar, pero que a aprobación dos presupostos non é inmediata, teñen que expoñerse publicamente un mes, senón non cumpre regulamentariamente. Durante ese período é no que Intervención prorroga os anteriores para poder facer fronte a algún pago derivado desas obras. O lóxico é que unha vez que entre en vigor o orzamento vixente se anule xa automaticamente, ou non se prorrogue con anterioridade, pero a Alcaldía só as aprobou unha vez. Entende o sr. alcalde que se levase uns orzamento nos que non figurasen a maioría dos investimentos que se van realizar, ao resto dos membros da Corporación non lles gustaría, engadindo que outra cuestión é que haxa que ter coidado, aínda que non precisamente pola súa parte.

A sra. Calvo aclara que ela preferiría que se tivese feito así, que con explicalo xa estaba, que non dirían nada, porque xa saben que estaban aprobados con anterioridade.

O sr. alcalde incide en que nese momento non se producira a prórroga do orzamento, no momento en que se aprobaron as obras, e que Intervención non fixera esa provisión, dando continuidade aos orzamentos anteriores.

A sra. Calvo responde novamente que podían terse aprobado os orzamentos tamén en tempo e forma e ter prudencia, ao que responde o sr. alcalde que aí si que lle ten que dar a razón, engadindo que entón igual deberían todos ter claras as obras do POS con anterioridade, e moitas cousas máis, porque se se aproban os orzamentos e, por exemplo, non se sabe nin en que se van gastar os investimento do POS, non vale de nada.

A sra. Calvo manifesta que todo é poñerse, porque materia hai para meter no POS, ao que lle responde o sr. alcalde que o que non saben son os cartos que van a ter, que non están os proxectos aprobados e que non se pode meter algo que non foi aprobado pola Corporación.

O sr. alcalde sinala que intentarán aprobar os orzamentos canto antes, pero que en todo caso é unha cuestión de prazos establecidos.

Preguntado polo sr. alcalde, non se apertura unha segunda quenda de intervencións.

**Sometido o asunto a votación, o Pleno da Corporación, por unanimidade dos seus membros (4 Son de Teo, 7 PP, 4 PSdeG-PSOE e 2 BNG), acorda:**

**Primeiro.- Declarar como non dispoñibles os seguintes créditos do estado de gastos do Orzamento Municipal para 2021 por estar duplicados:**

| <b>PARTIDA</b>    | <b>PROXECTO</b>                            | <b>IMPORTE</b>     |
|-------------------|--|--------------------|
| <b>160/619.00</b> | <b>BOMBEO DE SANEAMENTO EN CAXADE</b>      | <b>270.919,00€</b> |
| <b>453/619.00</b> | <b>AFIRMADO E ACONDIC EO DOS FERREIROS</b> | <b>101.851,21€</b> |



|            |   |             |
|------------|---|-------------|
| 450/619.00 | REURBANIZACION DO NUCLEO DE SESTELO           | 221.609,99€ |
| 134/619.00 | SENDA PEONIL DE SAN DOMINGOS A CS FOLGUEIRAS  | 187.169,91€ |
| 330/619.00 | MANTEMENTO E REFORMA DO CENTRO SOCIAL DE REIS | 87.926,36€  |

**Segundo.-** Dar conta do presente acordo aos servizos económicos municipais coa finalidade de que se realicen as anotacions contables pertinentes.

Sendo as vinte horas e nove minutos abandona o Salón de Plenos a interventora municipal D.<sup>a</sup> Monica I. Lado Varela.

## **6.- DITAME DA MOCIÓN DO GRUPO MUNICIPAL DO PSdeG-PSOE CON MOTIVO DO DÍA 25 DE NOVIEMBRE, DÍA INTERNACIONAL DA ELIMINACIÓN DA VIOLENCIA CONTRA A MULLER.**

O sr. alcalde cede a palabra á portavoz do PSdeG-PSOE, D.<sup>a</sup> Uxía Lemus de la Iglesia.

A sra. Lemus da conta da moción do seu grupo de 5 de novembro de 2021 (Rex. 999, nº entrada 2903, de 05/11/2021), que se recolle a continuación, ditaminada favorablemente pola Comisión Informativa benestar social, igualdade, transportes, turismo, comercio e emprego de 18 de novembro de 2021.

**“MOCIÓN QUE PRESENTA O GRUPO MUNICIPAL SOCIALISTA, ó abeiro do disposto nos artigos 91.4 e 97 do Regulamento de Organización, Funcionamento e Réxime Xurídico das Entidades Locais (Real Decreto 2568/1986), CON MOTIVO DO DÍA 25 DE NOVIEMBRE, DÍA INTERNACIONAL DA ELIMINACIÓN DA VIOLENCIA CONTRA A MULLER, PARA A SÚA CONSIDERACIÓN, DEBATE E POSTERIOR APROBACIÓN POLO PLENO DO CONCELLO DE TEO**

### **EXPOSICIÓN DE MOTIVOS**

Cada 25 de novembro, o grupo municipal socialista súmase á conmemoración do Día Internacional contra a Violencia contra as mulleres. Compartimos a dor de tantas mulleres que sofren violencia, das súas fillas e fillos, nais, pais, familiares e amizades. A elas diriximos todo o noso apoio, a convicción de que loitamos pola máis xusta das

causas e o noso compromiso de non deixar de avanzar ata erradicar da nosa sociedade a violencia machista. Sabemos que o camiño será longo, pero iso só fai máis urxente que apuremos o paso e que sigamos avanzando.

Desde 2003 foron asasinadas no Estado 1.117 mulleres e 44 nenas e nenos. Desde 2019 interpuxéronse 1.743.680 denuncias por violencia de xénero e 452.095 ordes de protección, e 652.795 mulleres recibiron o apoio dos Corpos e Forzas de Seguridade a través do Sistema de Seguimento Integral nos casos de Violencia de Xénero VIOGEN. Segundo os datos da Macroenquisa de violencia contra a muller, o 34,2% das mulleres de todo o Estado sufriron violencia por parte das súas parellas ou exparellas e o 47,2% non denunciou nin empregou os servizos públicos de axuda, e en moita maior medida no caso de mulleres novas.

En Galicia, cada día se incoan nos xulgados 17 novos procedementos penais por violencia contra a muller. Estes xulgados recibiron no segundo trimestre deste ano 1.649 denuncias por violencia machista, un 10,4 % máis que no mesmo período do ano pasado. Tamén con respecto a 2020 existiu un incremento do 9,6% no número de mulleres que son recoñecidas como vítimas, sendo a 30 de xuño de 2021 un total de 1.636. O primeiro Informe sobre a Violencia contra a Muller 2015-2019 apunta ademais que cerca da metade das infraccións penais cometidas contra mulleres en Galicia responden a violencia psíquica, a máis invisible das violencias machistas.

Non podemos resignarnos a que se asuma como normalidade a traxedia dolorosamente cotiá da violencia machista porque non é un destino escrito en pedra senón o resultado, tal e como sinala Nacións Unidas, “dunhas relacións de poder desiguais entre mulleres e homes que persiste como unha crise silenciosa”.

Como cada 25 de Novembro as e os socialistas alzamos a voz contra ese silencio. Sumamos a nosa palabra á de millóns de mulleres e homes que en todo o planeta din basta e reafirmamos ese compromiso tamén con feitos. Desde o Partido Socialista impulsamos o Pacto de Estado contra a Violencia de Xénero, a Lei Orgánica 1/2004, de 28 de decembro, de Medidas de Protección Integral contra a Violencia de Xénero, que supuxo o recoñecemento de que existe un tipo específico de violencia, a que se exerce contra as mulleres polo feito de ser mulleres e supuxo un cambio completo de perspectiva amplamente demandada polo movemento feminista.

Co Real Decreto-lei de medidas urxentes para o desenvolvemento do Pacto de Estado contra a violencia de xénero abordáronse os cambios legislativos necesarios para ampliar a protección das vítimas e as súas fillas e fillos, e durante a crise da COVID-19 puxéronse a disposición das administracións os fondos para previr e combater a violencia de xénero. Tamén a igualdade é un dos catro eixos principais do ‘Plan de Recuperación, Transformación e Resiliencia’ que lidera o Goberno de España e a loita contra a violencia machista terá un papel prioritario neste proceso.

O Pacto de Estado contra a Violencia de Xénero cumprirá a súa vixencia o próximo ano e consideramos que é o momento de coñecer o seu impacto, de avaliar, renovar e actualizar o compromiso contra a violencia machista, volvendo sumar o maior consenso posible para que a violencia de xénero siga a ser unha cuestión de Estado, que atinxe

a todos os partidos políticos. É o momento de mellorar a coordinación das diferentes administracións na loita contra a violencia de xénero, así como dotar esta tarefa co financiamento axeitado a través das Comunidades Autónomas e concellos, pero tamén a través das organizacións feministas da sociedade civil.

En cumprimento co Pacto de Estado contra a Violencia de Xénero, o Partido Socialista considera que os diferentes tipos de violencia que sofren as mulleres requiren de leis específicas e integrais para adecuar a necesidade de intervención e de protección a cada tipo de violencia. É urxente a aprobación da Lei Orgánica de Garantía da Liberdade Sexual -coñecida como Lei do Só Si é Si- para que o consentimento da muller sexa o aspecto fundamental sobre o que se configuran os delitos contra a liberdade sexual.

Consideramos que se debe avanzar cara a un novo marco legislativo orientado á abolición da prostitución. A trata con fins de explotación sexual non pode desligarse da prostitución, a forma máis terrible de violencia contra as mulleres. Son dúas caras dunha mesma realidade xa que a trata de mulleres e nenas con fins de explotación sexual existe porque hai demanda de mulleres e nenas para a prostitución. O Partido Socialista desexa unha sociedade onde as mulleres e as nenas non sexan prostituídas, nas que os corpos de mulleres e nenas non sexan obxectos de consumo. O noso modelo de sociedade é un no que homes e mulleres son iguais e libres e esa idea é incompatible coa prostitución e la trata de seres humanos.

Non podemos esquecer que a prostitución non é un problema das mulleres, senón de calidade democrática. Garantir a liberdade, a seguridade e a vida das mulleres e protexer as vítimas non é unha opción, é unha obriga. A violencia machista interpélanos e as administracións locais debemos combatela con todos os medios ao noso alcance.

No ámbito das nosas competencias, desenvolvemos un papel fundamental na prevención, así como na información, asesoramento, protección e acompañamento ás mulleres vítimas e seus fillos e fillas.

**Por todo isto, desde o Grupo Municipal Socialista de Teo propoñemos para a súa aprobación polo Pleno os seguintes acordos:**

- Ratificar o compromiso firme do Concello cos dereitos das mulleres, a erradicación de calquera tipo de violencia machista e combater calquera discurso negacionista e posicionamento político que negue a violencia de xénero ou rexeite as políticas públicas enfocadas á súa total erradicación.
- Impulsar e/ou reforzar as medidas contidas na Lei Orgánica 1/2004, de 28 de decembro, de Medidas de Protección Integral contra a Violencia de Xénero e no Pacto de Estado contra a Violencia de Xénero no marco das competencias municipais, así como o seu seguimento.
- Instar ao Goberno de España á actualización e renovación do Pacto de Estado contra a Violencia de Xénero en Cortes Xerais para buscar o maior consenso político e

social e á mellora da coordinación institucional para garantir que os Fondos do Pacto se implementen da maneira máis óptima.

- Dotar dos recursos económicos necesarios e axentes especializados os instrumentos de loita contra todas as formas de violencia contra as mulleres.
- Impulsar no marco das competencias municipais que as políticas públicas en materia de servizos sociais, sanidade, seguridade e igualdade teñan tamén como obxectivo a abolición da prostitución.
- Instar ao Goberno de España a impulsar un marco normativo orientado á abolición da prostitución.
- Colaborar coas asociacións da sociedade civil que loitan contra a violencia machista e traballan pola igualdade de homes e mulleres”.

Aberta a primeira quenda de intervencións, o portavoz do BNG, sr. Barreiro, manifesta o seu apoio á moción. Explica que non poden máis que sorprenderse de que se fale na moción da aprobación de leis, como por exemplo que se debe protexer ás mulleres da trata e da explotación, cando o PSOE é o que está no goberno do Estado dende xa fai dous anos, polo que pensa que xa van un pouco tarde. Considera o sr. Barreiro que tamén van tarde derogando as leis que hai que derogar, que xa foron prometidas fai anos, como por exemplo a mal chamada reforma laboral ou a Lei mordaza.

Intervén o portavoz do PP, sr. Guerra, quen anuncia o apoio do seu grupo,

A concelleira de Son de Teo, sra. Álvarez, anuncia o apoio do seu grupo.

Preguntado polo sr. alcalde, non se apertura unha segunda quenda de intervencións.

**Rematado o debate e sometido o asunto a votación, o Pleno da Corporación, por unanimidade dos presentes (4 Son de Teo, 4 PSdeG-PSOE, 7 PP e 2 BNG), acorda:**

- **Ratificar o compromiso firme do Concello cos dereitos das mulleres, a erradicación de calquera tipo de violencia machista e combater calquera discurso negacionista e posicionamento político que negue a violencia de xénero ou rexeite as políticas públicas enfocadas á súa total erradicación.**

- **Impulsar e/ou reforzar as medidas contidas na Lei Orgánica 1/2004, de 28 de decembro, de Medidas de Protección Integral contra a Violencia de Xénero e no Pacto de Estado contra a Violencia de Xénero no marco das competencias municipais, así como o seu seguimento.**
- **Instar ao Goberno de España á actualización e renovación do Pacto de Estado contra a Violencia de Xénero en Cortes Xerais para buscar o maior consenso político e social e á mellora da coordinación institucional para garantir que os Fondos do Pacto se implementen da maneira máis óptima.**
- **Dotar dos recursos económicos necesarios e axentes especializados os instrumentos de loita contra todas as formas de violencia contra as mulleres.**
- **Impulsar no marco das competencias municipais que as políticas públicas en materia de servizos sociais, sanidade, seguridade e igualdade teñan tamén como obxectivo a abolición da prostitución.**
- **Instar ao Goberno de España a impulsar un marco normativo orientado á abolición da prostitución.**
- **Colaborar coas asociacións da sociedade civil que loitan contra a violencia machista e traballan pola igualdade de homes e mulleres.**

## **7.- PROPOSICIÓN DO GRUPO MUNICIPAL DO BNG SOBRE O INCREMENTO DOS RECURSOS ECONÓMICOS DESTINADOS ESPECÍFICAMENTE A LOITAR CONTRA A VIOLENCIA DE XÉNERO.**

O sr. alcalde aclara que esta moción tivo un problema no prazo de presentación polo que se incorporou na orde do día do Pleno, aínda que non foi ditaminado por Comisión Informativa, é resulta necesario ratificar a súa inclusión na orde do día.

**Sometida a votación, o Pleno da Corporación, por unanimidade dos seus membros, acorda ratificar a inclusión do asunto na orde do día, de acordo cos artigos 82.3 e 97.2 do ROF e 31.2 do ROM.**

O sr. alcalde cede a palabra á concelleira do BNG, sra. Diéguez.

A sra. Diéguez da conta da proposición do seu grupo de 10 de novembro de 2021 (Rex. 999, nº entrada 3017, de 17/11/2021), que se recolle a continuación.

**“O Grupo municipal do BLOQUE NACIONALISTA GALEGO** no Concello de Teo, ao abeiro do Regulamento orgánico municipal do Pleno da Corporación, presenta a seguinte moción **sobre o incremento dos recursos económicos destinados especificamente a loitar contra a violencia de xénero** para o seu debate en Pleno.

#### **Exposición de motivos:**

A loita contra a violencia machista é un dos retos máis grandes e dos deberes urxentes da sociedade galega.

No que vai de ano 2021 Galiza xa tivo que saír á rúa condenar un feminicidio cometido na Coruña, á espera de que conclúan as investigacións respecto doutro asasinato dunha muller no Barco de Valdeorras. Segundo os datos do IGE, durante o 1º semestre de 2021 a Atención polo Punto de Coordinación das Ordes de Protección abordou o seguimento de 536 novos expedientes e foron comunicadas máis de 500 medidas de protección. Así mesmo, diversos colectivos denunciaron recentemente o incremento da violencia obstétrica por mor das dificultades de acceso aos servizos durante a pandemia, así como a permanencia da vulneración de dereitos como o acceso a un aborto digno e gratuïto no sistema público de saúde.

A pandemia da covid-19 trouxo ao noso contexto actual unha importante crise sanitaria, social e económica que atravesamos de forma moi intensa a realidade das mulleres, un dos sectores máis afectados da nosa sociedade. É evidente que neste contexto, aínda que invisibilizada, a violencia machista continuou connosco. Asociacións de mulleres, institucións e profesionais de diferentes ámbitos coinciden na grave afección das medidas de confinamento e de restrición de actividade e mobilidade social para a actuación sobre a violencia machista e o grave risco para milleiros de mulleres.

Entre outros exemplos, podemos sinalar como na súa Memoria anual do ano 2020, coñecida en outubro, a Fiscalía Superior de Galiza sinala que hai un nicho de criminalidade que a pandemia ocultou e que no ámbito da violencia machista “o nivel de convivencia que a situación xerou, sen ningunha dúbida, supuxo un aumento que as cifras derivadas da fría estatística non

reflicten, pero que aparecerá seguramente nun futuro non moi afastado ao atoparse actualmente soterrada, de forma que pronto, entendemos, xurdirá un goteo de procedementos cuxa orixe ou aparición se deriva da pandemia.”

Polo tanto, aínda que a situación da pandemia estea nunha fase de control, é necesario que se atendan todas as súas repercusións, tamén no ámbito da violencia machista. É necesario, polo tanto, abordar a necesidade de fortalecer os medios existentes e de adquirir máis compromisos orzamentarios, legislativos e políticos.

Nos últimos anos Galiza é exemplo de importantes avances institucionais, como o recoñecemento da violencia vicaria como violencia machista, e de importantes mobilizacións, como amosa a cada vez maior resposta aos feminicidios, en concovatorias e asistencia, ou as históricas manifestacións dos 8 de marzo. Estes feitos dan conta da fartura social e do gran rexeitamento á violencia machista da sociedade galega, como tamén reflicten os datos da enquisa sobre percepción da violencia de xénero por parte da sociedade galega, que sinala como o 80% da sociedade entende que este é un problema social que atinxe a todas as persoas e non se circunscribe ao ámbito privado.

Por todos estes motivos, é necesario que este 25 de novembro fuxa de ritualismos e declaracións de intencións e que colectivamente asumamos máis compromisos.

Por estes motivos, o BNG solicita do Pleno da Corporación Municipal a adopción do seguinte acordo:

1. Demandar da Xunta de Galiza o incremento dos recursos económicos destinados especificamente a loitar contra a violencia de xénero do proxecto de orzamentos de 2022 de forma que se sitúen, como mínimo, no 1% do total e así dotar de suficientes recursos para que se rectifique a liña de incumprimento da Lei 11/2007, do 27 de xullo, galega para a prevención e o tratamento integral da violencia de xénero, como por exemplo no ámbito da atención psicolóxica garantida desde a atención primaria.
2. Demandar da Xunta de Galiza o reforzo e ampliación da rede de Centros de Información ás Mulleres para garantir a cobertura do conxunto do territorio especialmente aquelas comarcas que actualmente carecen deste servizo así como a dotación dos medios humanos e materiais necesarios para reforzar o cadro de persoal daqueles CIM que asumen unha maior carga de traballo. Para tal fin, a Xunta de

Galiza elaborará e remitirá á Cámara galega e á FEGAMP antes de finalizar o presente ano un Plan específico debidamente orzamentado e coa correspondente planificación temporal para levalo a cabo”.

Aberta a primeira quenda de intervencións, a portavoz do PSdeG-PSOE, sra. Lemus anuncia o apoio do seu grupo.

Intervén o portavoz do PP, D. José Manuel Guerra Calvelo, quen lle cede a palabra á concelleira do seu grupo, D.<sup>a</sup> Dolores Nariño Facal.

A sra. Nariño aclara que só quere facer un matiz acerca do investimento en materia de igualdade, pois quere deixar claro que dende a Secretaría Xeral de Igualdade contarase para o 2022 cun orzamento de 31,4 millóns de euros, o cal supón un 14% máis que no 2021, cando se destinaron 27,6 millóns, polo que se está no senso de incremento.

Segue indicando que en igualdade e loita contra a violencia de xénero investírase no 2022 un total de 29,4 millóns de euros mentres que no 2009 se destinaron 13,8 millóns de euros. Di que nese ano, no 2009, estaba o bipartito, co cal entende que é un dato obxectivo ao que se podería facer referencia.

Sinala a sra. Nariño que, respecto ao outro punto no que se fala de que dalgún xeito haxa un mínimo do 1% do total, indica que no orzamento que ten Política Social destinado a conciliación e políticas de igualdade agora mesmo acadarían un 1,43% do total dos orzamentos previstos, co cal supera ese 1%.

O sr. alcalde anuncia o apoio do seu grupo.

Preguntado polo sr. alcalde, non se apertura unha segunda quenda de intervencións.

**Rematado o debate e sometido o asunto a votación, o Pleno da Corporación, con dez votos a favor (4 Son de Teo, 4 PSdeG-PSOE e 2 BNG) e sete abstencións (7 PP), acorda:**

**1.- Demandar da Xunta de Galiza o incremento dos recursos económicos destinados especificamente a loitar contra a violencia de xénero do proxecto de**

orzamentos de 2022 de forma que se sitúen, como mínimo, no 1% do total e así dotar de suficientes recursos para que se rectifique a liña de incumprimento da Lei 11/2007, do 27 de xullo, galega para a prevención e o tratamento integral da violencia de xénero, como por exemplo no ámbito da atención psicolóxica garantida desde a atención primaria.

**2.- Demandar da Xunta de Galiza o reforzo e ampliación da rede de Centros de Información ás Mulleres para garantir a cobertura do conxunto do territorio especialmente aquelas comarcas que actualmente carecen deste servizo así como a dotación dos medios humanos e materiais necesarios para reforzar o cadro de persoal daqueles CIM que asumen unha maior carga de traballo. Para tal fin, a Xunta de Galiza elaborará e remitirá á Cámara galega e á FEGAMP antes de finalizar o presente ano un Plan específico debidamente orzamentado e coa correspondente planificación temporal para levalo a cabo.**

## **8.- MOCIÓNS.**

Antes de entrar no punto noveno da orde do día relativo a rogos e preguntas, o sr. alcalde, comenta que, tal como se trasladou no día de onte por correo electrónico, o seu grupo municipal presenta unha moción de urxencia pola eliminación da superstición como criterio técnico. Manifesta que a razón da urxencia é porque foi nestes días cando se coñeceu esta situación e pensan que é un absurdo mantela, polo que cando antes se corrixa moito mellor.

**Sometida a urxencia a votación, o Pleno da Corporación, con seis votos a favor (4 Son de Teo e 2 BNG) e once votos en contra (7 PP e 4 PSdeG-PSOE), acorda que non se proceda ao debate e posterior votación da moción do grupo municipal de Son de Teo pola eliminación da superstición como criterio técnico.**

## **9.- ROGOS E PREGUNTAS.**

### **ROGOS E PREGUNTAS FORMULADOS POLO BNG.**

O/a concelleiro/a do BNG, formulan os/as seguintes rogos e preguntas:

1.- O sr. Barreiro comenta que con respecto ás beirarrúas que se están facendo pola zona da Cascalleira hai queixas de que se están facendo demasiado altas e que quedan as casas máis baixas que a propia beirarrúa. Sinala que non sabe se iso se pode amañar dalgunha forma, engadindo que non semella moi aquelado que haxa que baixar ás casas.

O sr. alcalde aclara que a situación, altura e características técnicas estaban descritas en proxecto, pero de calquera xeito na última visita que se fixo á obra perduraba unha situación conflitiva en dous ou tres casos, ben porque batía o coche, ou por un tema de augas e de acceso que quedou sen amañar aínda, e algunha outra máis, en principio quedaron todas resoltas. Sinala que se acordou tamén que en vez de esperar ao final da obra para rematar todo, a ver se era posible ir rematando a actuación por partes para non xerar aí situacións incómodas dunha forma permanente.

2.- O sr. Barreiro di que lles chegaron queixas de que, na mesma zona da Cascalleira, non hai semáforo ou está apagado usualmente, e os coches soben e baixan e un día pode haber un desgusto ou simplemente teñen que dar marcha atrás 1,5 km. Pide que se lle dea solución.

3.- O sr. Barreiro refírese ao problema da auga en Campos de Mirabel, e di que xa se sabe cal é a problemática e algunha das solucións posibles. Pide que se poñan xa a traballar en solucionalo, porque levan así polo menos dende o 2012.

O sr. alcalde comenta que entenden que é unha das obras prioritarias que o BNG trasladou para a realización do POS e entón en principio o que se vai facer é encargar a realización do proxecto, que aínda que sexa unha cuestión relativamente pequena hai que coñecer o alcance económico.

4.- Indica o sr. Barreiro que un veciño de Bustelo ten unha entrada á casa de apenas 30 metros, sen asfaltar, e que daquela a concelleira dixéralle que estaba autorizado polo departamento de urbanismo facer esa obra. Pregunta se se vai a manter esta intención ou se cambiou algo.

O sr. alcalde di que a verdade é que descoñecen en concreto a situación, pero que se comprometen nesta semana a mirar e ver en que punto está para intentar solucionalo.

O sr. Barreiro comprométese a enviarlle ao sr. alcalde por correo electrónico o número da vivenda, posto que nestes intres non se lembra.

5.- Indica o sr. Barreiro que as acacias da Casa Común da Torre seguen sen cortarse, e pensa que é un tema fácil de solucionar.

6.- Pregunta o sr. Barreiro por unha tapa de subministro que hai nunha beirarrúa, subindo para Parque Montouto, despois da rotonda dos Tilos, que non sabe se o material do que está feito é aluminio, pero é moi esvaradizo. A sra. Carmen Diéguez puntualiza que hai dúas tapas. O sr. Barreiro segue dicindo que é un material que claramente non é o axeitado para poñer unha tapa e que xa houbo varias persoas que estiveron a punto de caer.

O sr. Igrexas pregunta exactamente onde está, indicándolle o sr. Barreiro o punto exacto.

7.- O sr. Barreiro interésase por un trozo de terreo que un veciño de Solláns pretendía ceder ao Concello, que seica non se lle respondeu. Pregunta se hai previsión de facelo.

O sr. alcalde responde que antes de fin de ano concretarase.

8.- O sr. Barreiro di que había unha fochanca na Silva, en Lampai, na altura do número 28, que parece ser que é bastante importante e incluso perigosa, pola súa dimensión.

9.- A sra. Diéguez lembra o lixo que había polo monte, indicando que se recolleu o plástico, pero quedaron máis restos.

O sr. Igrexas di que non é só alí, senón que pensa que debe de haber un matadoiro ilegal, pois na zona da Casalonga está igual, e onda a Canteira hai un montón de bolsas azuis que deixan con restos de matanzas.

A sra. Diéguez sinala que as rodas non se recolleron.

O sr. Igrexas responde que as rodas non pode recollelas GESECO, pois é un residuo contaminante e iso é unha cuestión do SEPRONA. Explica que se trata dun problema porque se están nunha finca privada sería o dono da mesma o que tería que levalas a reciclar, porque non é un residuo que se poida coller e levar ao punto limpo, é un

residuo máis contaminante. Manifesta tamén que as hai en máis sitios, engadindo que o terá en conta e mirará como se pode solucionar.

### **ROGOS E PREGUNTAS FORMULADOS POLO PSdeG-PSOE:**

Os/as concelleiros/as do PSdeG-PSOE formulan os seguintes rogos:

1.- A sra. Lemus sinala que a veciñanza de Beitureira pide un taboleiro, porque agora non teñen.

2.- A sra. Lemus di que viu nas redes que hai unhas novas placas para as rúas e pregunta se se vai cambiar tamén a numeración ou só se van facer as placas, porque a numeración tampouco é que se vexa case nada e se desgastou moi rápido.

O sr. Igrexas comenta que en principio o que se fixo foi editar, segundo o logo, a imaxe do Concello, facer unha imaxe de placa porque non a había, e se van cambiar as placas das rúas. A continuación é posible que se cambie algunha numeración, porén a cuestión non é tanto cambialas senón dar a posibilidade de cambialas.

O sr. alcalde di que en principio, dende hai bastante tempo xa, cando algún particular reclamaba, porque se atopaba unha placa en mal estado, dicíase que nese momento a placa se puxera debido á numeración nova, pero xa a partir daquel momento tanto as casas que non tiñan número asignado porque non estaban construídas ou o que fose, xa os particulares con total liberdade poden poñer o seu número.

O sr. Igrexas di que se vai facer un modelo segundo a mesma tipografía e imaxe, e que se trata dunha cousa que vai a estar colgada.

3.- A sra. Lemus refírese ao Centro de Saúde dos Tilos e di que o Conselleiro saíu o outro día dicindo que mandara unha carta aos alcaldes pedíndolle a nova parcela. Pregunta a sra. Lemus se xa se mandou.

O sr. alcalde explica que se recibiu, pero que non se lle contestou aínda, que a previsión é contestar na próxima semana porque hai unha dúbida con respecto á edificabilidade e a superficie da parcela, pois na carta que remitiron fálase dunha superficie edificable moi grande, de case 2.500 metros cadrados, e a edificabilidade na parcela pola lei pensa que é do 0,3 ou incluso menor, co cal é posible que o Concello

se teña que facer con un cacho doutra parcela próxima para conseguir esa superficie. Salienta o sr. alcalde que iso o ían a determinar dende urbanismo, engadindo que, salvo ese problema, o resto en principio estaría todo bastante avanzado e a idea do equipo de goberno é mandalo canto antes para intentar, se se pode, adiantar de fase.

### **ROGOS E PREGUNTAS FORMULADOS POLO PP:**

Os/as concelleiros/as do PP formulan os seguintes rogos:

1.- O sr. Guerra comenta que anotou o que dixo o compañeiro sobre a Cascalleira, e entende que efectivamente non sabe se a normativa di a altura da beirarrúa, pero pensa que se está a tempo de corrixilo.

2.- O sr. Guerra indica que, segundo a veciñanza, a pista de Tarrío a Vilanova está en mal estado e que aí hai unha que vai ao número 2, que son 50 metros, aproximadamente, de terra, e pide que se asfalte.

3.- Refírese o sr. Guerra ao paso de peóns do edificio de Mais Palomas, tan demandado pola xente, e solicita que se mire de poñelo.

4.- Refírese o sr. Guerra ao muíño da Ribera ei di que se estivo limpando e agora hai un tempo que non se limpa. Pide que se lle dea unha limpeza.

O sr. Igrexas comenta que o cauce non se pode limpar.

O sr. Guerra pide tamén unha barandilla para alí.

5.- Di o sr. Guerra que no alto da Veiga, en Teo, a estrada que vai dende Campos a Noceda está nun estado lamentable, e hai un sinal que marca cinco toneladas e non sabe se se lle borrou porque o círculo está todo negro. Pide que se repara a estrada e que se substitúa o sinal.

6.- Refírese o sr. Guerra ás pistas que van a Noceda, di que están desfeitas e pide que se arranxen.

7.- O sr. Guerra di que o outro día pasou por Campos de arriba e entre o número 51 e o número 63 hai uns socabóns moi importantes, e pide que se arranxen.

8.- Refírese o sr. Guerra á pista de Procelas a Tras do Eixo, por onde pasa o autobús do IES, o Teobus, e sinala que está en moi mal estado e pide que se revise.

9.- A sra. Vázquez sinala que no campo de fútbol de Calo na fin de semana pasada non había electricidade. Si había luz pero non electricidade nos enchufes, e precisouse recargar unha batería dunha cámara e non se puido facer.

Sinala a sra. Vázquez que no campo de fútbol do Praíña un dos focos non alumean. Sinala que descoñece se é intencionadamente ou porque están avariados, polo que pide que se revisen.

O sr. Igrexas, tratándose do campo de fútbol de Calo, sinala que hai que cambiar a instalación, que se vai facer unha obra e pode ser que haxa algún que non funcione. Explica que as instalacións dos campos de fútbol fixéronse sen ningún tipo de planificación, polos equipos, como puideron, non hai planos nin nada en que basearse polo que agora o que hai que facer é practicamente tiralas todas e volver a facelas. Sinala que se está elaborando un proxecto para reformar todo o interior do campo municipal de Rebordelo e unha das cousas que mais preocupan son as instalacións eléctricas.

En referencia ao campo do Praíña, explica o sr. Igrexas que ten unhas condicións mellores. Indica que houbo un problema cunha subida de tensión e fastidiou dous focos, que se están a reclamar a Fenosa, pero para iso tense que facturar unha empresa exterior, pois se se fai dende o Concello non se lle pode facturar a Fenosa.

10.- A sra. Vázquez pregunta pola estrada que da acceso ao campo de fútbol do Praíña e ó CSC da Pontevella, pois tanto en relación a esa como a que sae pola parte de abaixo e que da acceso aos aparcadoiros, xa se solicitara que se mirase e se intentase reparar cando houbo as obras, porque quedara moi deteriorada. Explica a sra. Vázquez que o deterioro foi en aumento e que unha señora caeu e torceu un nocello. Indica que é unha zona pola que soen pasear, e hai un par de veciñas que agora non queren saír precisamente porque entre a inestabilidade e a visión que elas teñen non lle da seguridade, e outra familia que saíu cunha cadeira de rodas, amén quedaron entallados nun dos baches.

O sr. Igrexas comenta que iso consolidouse como aparcadoiro e que a idea é traballar para consolidar un carril de circulación marcado, que dalgún xeito separe o aparcadoiro do propio carril de circulación, e limitalo a 20/30 km, facendo un carril de acceso peonil. Explica que a idea é non asfaltar ao mellor todo o que é o aparcamento, porque como aparcadoiro funciona, pero si reforzar o carril de acceso e separalo da zona de aparcadoiro.

11.- A sra. Vázquez refírese á estrada de Olveira, e di que pensa que xa se meteu nas propostas, porén agora ademais da zona principal, tamén as que dan acceso á parte de Pite empezan a estar deterioradas.

12.- A sra. Nariño explica que na aldea de Sestelo, onde está o núcleo que está pavimentado con formigón, cando remata o acceso que hai para Bouñou, hai unha fochanca terrible. Descoñece se foi polas obras ou polo que fose, pero pide que se repare.

13.- A sra. Nariño refírese ao tema da seguridade nas obras que se están facendo pola senda peonil dende Pontevea cara Rarís, e sinala que se está xerando que cando se cruzan dous coches ou ben se levan a parte de madeira que está posto para armar a aceira, ou se sae fóra da estrada e se arriscan a un accidente. Houbo unha persoa que se saíu fóra co coche e que de feito ten o coche no taller. Descoñece a sra. Nariño cal é a medida, pero se se fai, que a obra se axilice e se faga canto antes.

O sr. Guerra indica que as que xa están feitas non se vai tirar con elas, pero as que se está a tempo de corrixir, que se faga, que se lle de 30 ou 40 centímetros para atrás.

14.- A sra. Castro pregunta se se pode volver a colocar o contedor de lixo que estaba no cruce que vai cara ao colexio de Calo, porque cada vez que o camiión o vai baleirar déixao como 20 ou 30 centímetros cara a estrada, e alí non caben dous coches. A veciñanza pide que se busque algún sitio para recolocalo e sacalo de alí.

15.- A sra. Castro pide que se arranxen os semáforos das obras na Cascalleira.

16.- Con respecto á limpeza das papeleiras dos campos de fútbol, a sra. Castro pregunta se as que están do lado de fóra, xusto nas entradas tanto de vestiarios coma das entradas principais, as limpa o Concello ou é responsabilidade da S.R. de Calo.

O sr. Igrexas di que os servizos de limpeza do Concello limpan as instalacións municipais e o que está fóra teoricamente está en terreo privado e tería que limpalo quen o puxo alí. Normalmente, de vez en cando, límpase polo servizo de limpeza viaria, pero se alguén instala unha papeleira nun espazo privado hai un problema.

Explica o sr. Igrexas que as papeleiras de dentro das instalacións límpanse todas as semanas, pois é o que cubre o servizo de limpeza municipal, sen embargo nun futuro corto a idea é sacar aquela papeleira de alí e poñela dentro, porén dentro dos campos nin se pode nin se vai poder fumar.

A sra. Castro indica que se refería ao campo do Calo, que ó que ten as dúas papeleiras, unha na entrada principal, que lle preguntou á persoa de limpeza e que esta lle respondeu que non lle deixaban retiralo, sen embargo un día si o fixo porque ao parecer dáballo noxo ver aquilo así.

O sr. Igrexas incide de novo en que a que está nas portas dos vestiarios habería que sacala directamente, pois nos vestiarios xa dispoñen dese equipamento.

17.- A sra. Castro explica que un veciño de Montouto chamouna para informarlle de que o 16 de novembro presentara por rexistro, con número de entrada 5831, unha comunicación sobre a colocación dun semáforo sonoro na zona de Eroski, en Montouto, xa que este veciño é invidente. Pregunta a sra. Castro como se vai actuar ante esta petición.

O sr. alcalde di que en principio parece unha petición razoable, e que se están valorando as posibilidades técnicas que hai. O equipo de goberno entende que si que é necesario o permiso de Estradas, porque o semáforo xa está establecido e entón esperan darlle unha solución pronto.

18.- A sra. Calvo sinala que no colectivo de taxistas pediron por rexistro actualizar as tarifas, e incluso tiveron unha reunión coa concelleira de mobildade, pois están dende o 2014 conxeladas e tenlles certa urxencia o tema. Sinala que, con respecto ás de Compostela e Ames, son as peores. Pregunta a sra. Calvo como está o tema.

A sra. López responde que valorará a situación, pois pensa que non é unha decisión que implique só ao departamento de mobilidade. Explica que falou con eles e é unha decisión que se vai tomar pronto, e que xa o saben as persoas afectadas.

19.- A sra. Calvo quere reiterarse no que pide o grupo municipal do PP con respecto ao POS, a prioridade de que se asfalten eses 50 metros onde a casa da viúva, en San Domingo, e pregunta se finalmente se vai a levar a cabo ou non.

O sr. alcalde responde que si.

E non habendo máis asuntos que tratar, sendo as vinte horas e cincuenta minutos, de orde da Presidencia, levántase a sesión, da que se estende a presente acta, do que eu, secretaria, dou fe.

O alcalde

A secretaria

Rafael C. Sisto Edreira

Virginia Fraga Díaz

## **ANEXO**

**RESOLUCIÓN DA ALCALDÍA DO 20/10/2021 (RES  
1110.21) DE APROBACIÓN DO “PREGO  
PRESCRICIÓNS TÉCNICAS QUE REXERÁN A  
SUBMINISTRACIÓN DUN SILO DE ACEIRO PARA  
ALMACENAMENTO DE LODOS NA EDAR DE  
PONTEVEA”(POS+2021)**

## RESOLUCIÓN DA ALCALDIA

**ASUNTO:** APROBACION DO “PREGO PRESCRICIÓN S TÉCNICAS QUE REXERÁN A SUBMINISTRACIÓN DUN SILO DE ACEIRO PARA ALMACENAMENTO DE LODOS NA EDAR DE PONTEVEA”

**EXPEDIENTE:** 2021/G003/001178

Considerando que o Pleno da Corporación, na sesión ordinaria celebrada o 29 de setembro de 2021, acordou participar na segunda fase do POS+ADICIONAL 2/2021, da Deputación da Coruña, e solicitar a aplicación da achega á subministración que se indica a continuación, aprobando así mesmo o “PREGO PRESCRICIÓN S TÉCNICAS QUE REXERÁN A SUBMINISTRACIÓN DUN SILO DE ACEIRO PARA ALMACENAMENTO DE LODOS NA EDAR DE PONTEVEA”, de 17 de setembro de 2021, incorporado ao expediente.

| ACHEGA PROVINCIAL 2021   | Financiamento do investimento |            |                  |
|--|-------------------------------|------------|------------------|
| Denominación da subministración  | Deputación                    | Concello   | Presuposto total |
| Silo para almacenamento de lodos de 33 m <sup>3</sup> de capacidade, en aceiro de 5mm, para a EDAR de Pontevea | 17.084,13€                    | 27.480,17€ | 44.564,30€       |
| Subtotal investimento achega provincial adicional 2/2021 2ª fase   | 17.084,13€                    | 27.480,17€ | 44.564,30€       |

Considerando que, o citado acordo, xunto co prego de prescrición s aprobado, foi remitido a través de SUBTEL, á Deputación Provincial de A Coruña, o 1 de outubro de 2021.

Visto o requirimento formulado pola Deputación Provincial, o 11 de outubro de 2021, poñendo de manifesto a necesidade de subsanar algúns aspectos do prego de prescrición s técnicas e de remitir algúns dos anexos esixidos nas Bases do POS +2021.

Visto o “PREGO PRESCRICIÓN S TÉCNICAS QUE REXERÁN A SUBMINISTRACIÓN DUN SILO DE ACEIRO PARA ALMACENAMENTO DE LODOS NA EDAR DE

PONTEVEA”, de 18 de outubro de 2021, debidamente subsanado, segundo o requirido pola Deputación Provincial.

Considerando que, segundo informa a Deputación, o día 20 de outubro procederá ao peche da plataforma para incorporar a subsanación solicitada, polo que resulta preciso atendela á maior brevidade posible e considerando que o Pleno, na sesión celebrada o 29 de setembro, acordou facultar expresamente “*á Alcaldía para todo o relacionado coa tramitación e xestión do presente acordo e o correspondente expediente*”.

En virtude do exposto, e no uso das facultades que me confire o artigo 21.1 da Lei 7/1985, do 2 de abril, reguladora das bases do réxime local e demais normativa aplicable,

**RESOLVO:**

**Primeiro**.- Aprobar o “PREGO PRESCRICIÓNS TÉCNICAS QUE REXERÁN A SUBMINISTRACIÓN DUN SILO DE ACEIRO PARA ALMACENAMENTO DE LODOS NA EDAR DE PONTEVEA”, de 18 de outubro de 2021, incorporado ao como anexo á presente.

**Segundo**.- Remitir o citado prego, xunto co presente, á Deputación Provincial de A Coruña.

**Terceiro**.- Dar conta ao departamento de urbanismo, ao departamento de augas, e ao departamento de intervención, para ao seu coñecemento e efectos oportunos.

**Cuarto**.- Dar conta ao Pleno na vindeira sesión ordinaria que se celebre, para a súa ratificación.

Teo, asinado, polas persoas que se detallan a continuación, na data da sinatura dixital que figura na marxe.

O alcalde,  
Rafael C. Sisto Edreira

A secretaria xeral, que dou fe  
Virginia Fraga Díaz

## ANEXO





**“PREGO PRESCRICIÓNS TÉCNICAS QUE REXERÁN A  
SUBMINISTRACIÓN DUN SILO DE ACEIRO PARA ALMACENAMENTO  
DE LODOS NA EDAR DE PONTEVEA”**

## 1. ANTECEDENTES

No ano 2008 realizase o proxecto e a execución da obra de “Colectores xerais e estación depuradora de augas residuais en Pontevea. Teo (A Coruña)”. Clave: OH.315.455, cun presuposto base de licitación de 2.597.740,46 euros. Dito proxecto inclúe o saneamento integral dos núcleos situados no leste do Concello de Teo.

Debido o continuo crecemento que ven experimentando o Concello de Teo nos últimos anos, e a ampla zona a que da servizo a EDAR de Pontevea, o caudal de auga residual a tratar na EDAR vese incrementado ano a ano, e en consecuencia, tamén aumentan de xeito importante as toneladas de lodos a xestionar.

## 2. DESCRICIÓN SISTEMA DE TRATAMENTO DE LODOS DA EDAR DE PONTEVEA.

| DEPURADORAS > 2.000 h.e.  | EDAR DE PONTEVEA  |
|---|---|
|      | <h3>Datos Administrativos - Económicos</h3> <p><b>CONCELLO:</b> Teo<br/> <b>CÓDIGO MASA DE AUGA:</b> ES.014.NR.244.000.05.02<br/> <b>NOME MASA DE AUGA:</b> Río Ulla<br/> <b>TIPO MASA DE AUGA:</b> Río<br/> <b>ESTADO MASA DE AUGA:</b> Bo ou mellor<br/> <b>ORGANISMO DE CONCA:</b> Augas de Galicia<br/> <b>TITULAR:</b> Concello de Teo<br/> <b>EXPLOTADOR ACTUAL:</b> Concello de Teo<br/> <b>INICIO DE FUNCIONAMENTO:</b> 2009<br/> <b>CUMPRIMENTO D91/271/CE (Q2017):</b> si</p>   |
|  <p>The diagram illustrates the sludge treatment process. It starts with 'REJA LULA' (screening), followed by 'DECANTADOR 2º' (secondary clarifier), 'REACTOR BIOLÓGICO' (biological reactor), and 'PRETRATAMIENTO COMPACTO' (compact pretreatment). The process then moves to 'ESPESADOR POR GRAVEDAD DE FANGOS' (gravity thickener), 'CENTRIFUGA' (centrifuge), and finally 'SECA DE GASES' (gas dryer). A legend indicates 'AGUA' (water) and 'FANGO' (sludge).</p> | <h3>Características Técnicas</h3> <p><b>POBOACIÓN EQUIVALENTE DE DESEÑO:</b> 11.500 h.e.<br/> <b>CAUDAL MEDIO DE DESEÑO:</b> 2.300 m<sup>3</sup>/d<br/> <b>CAUDAL PUNTA DE DESEÑO:</b> 144 m<sup>3</sup>/h<br/> <b>DESCRICIÓN:</b></p> <ul style="list-style-type: none"> <li>- <b>Pretratamento:</b> Reixa, tamiz e desareado-desengraxado</li> <li>- <b>Tratamento primario:</b> -</li> <li>- <b>Tratamento secundario:</b> Lodos activados</li> <li>- <b>Tratamento avanzado:</b> Eliminación de nutrientes (nitroxeno). Desinfección por cloración</li> <li>- <b>Liña de lodos:</b> Espesador e centrífuga</li> </ul> |

O lodo espesado diríxese a unha centrífuga da marca ALFA LAVAL de caudal de deseño 4 m<sup>3</sup>/h de lodo ó 3%, cuxo obxectivo é alcanzar unha sequidade final do 18% mediante a adición de polielectrolito. O lodo

xa deshidratado deposítase nun contedor de 5 m<sup>3</sup> de capacidade, que se encontra xusto debaixo da centrífuga, onde se almacena para a su posterior xestión mediante xestor autorizado.




### 3. ALTERNATIVA PROPOSTA: SILO DE LODOS

Esta tipo de montaxes, onde a máquina se coloca encima do contedor, presenta dous problemas importantes, e que son os seguintes:

- Limitación da capacidade do contedor, non podendo colocar un de maior tamaño, xa que non entraría debaixo da máquina, o que abarataría os custos de transporte dos lodos.
- Autonomía no funcionamento da centrífuga, xa que implica a atención do operador de planta case de xeito continuo para que os lodos deshidratados non atasquen a saída da centrífuga, o que deriva nunha inversión importante de tempo do longo da xornada.

Polo anterior, para facilitar a xestión, tanto do almacenamento como do transporte, dos lodos deshidratados, dende o Servizo Municipal de Augas de Teo, propónse a colocación dun silo de lodos cunha capacidade mínima de 30 m<sup>3</sup>, que sería suficiente para incrementar de xeito importante a capacidade de almacenamento dos lodos e, deste xeito, reducir os custos de transporte dos mesmos ata o xestor autorizado.

O lugar escollido para a colocación do silo, traballos que serán executados polo persoal do Servizo de Augas de Teo, sería a seguinte:



#### 4. CARACTERÍSTICAS TÉCNICAS E ORZAMENTO DO SILO

O silo de lodos proposto debe ter as seguintes características:

| CONCEPTO  | MEDICIÓN | PRECIO UD.              | IMPORTE TOTAL     |
|---|----------|-------------------------|-------------------|
| <b>Silo de almacenamento e lodos de 30-35 m3 de capacidade, executado en aceiro S-275-JR, cun espesor mínimo de de 5 mm, chorreado exterior e interiormente a grado Sa 2 1/2, pintura interior Alcatrán epoxi, exterior epoxi e acabado en poliuretano alifático, con escaleiras de acceso á parte superior e á válvula de descarga. Varandas de protección. Incluindo transporte ata a EDAR de Pontevea.</b> | 1        | 35.230,00€              | 35.230,00€        |
| <b>Sensor de nivel de lodos</b>   | 1        | 1.600,00€               | 1.600,00€         |
|   |          | <b>IMPORTE MATERIAL</b> | <b>36.830,00€</b> |
|   |          | 21% IVE                 | 7.734,30€         |
|   |          | <b>IMPORTE TOTAL</b>    | <b>44.564,30€</b> |

#### 5. RESUMO ECONÓMICO

De acordo co anterior, obtense un Orzamento de Execución material de TRINTA E SEIS MIL OITOCENTOS TRINTA EUROS, que incrementados no 21%<sup>o</sup> do IVE vixente, resulta un orzamento total de **CORENTA E CATRO MIL CINCOCENTOS SESENTA E CATRO EUROS CON TRINTA CÉNTIMOS.**

#### 6. PRAZO

O prazo para a realización do servizo será de 12 semanas a partir da sinatura do contrato.

#### 7. PRAZO DE GARANTÍA

A garantía mínima esixida para todo o material a subministrar será de 1 ano, sen ningún tipo de límite nin exclusión de compoñentes ou pezas.

Tódolos sistemas, compoñentes e produtos a adxudicar nos contratos, deberán ser conformes coa normativa vixente da Unión Europea e española no referente ós seus aspectos de calidade, ergonómicos, medioambientais, aforro enerxético, compatibilidade electromagnética e seguridade. As empresas licitadoras deberán achegar a certificación de homologación nacional ou internacional coas que conte dito equipamento, especialmente aquelas que teñan que ver coa seguridade, sensibilidade, resistencia, ruído e danos ó medioambiente e as que afecten a criterios avaliados. Artigos 89\_90\_93\_94\_95\_97\_126 e 128 da lei 9/2017 de 8 de novembro.

Teo, dezoito de outubro de 2021

Ado. Andrés García Amarante

Xefe Servizo Augas de Teo “